

Yaada Cuunfaa

**Itoophiyaa Keessatti Miidhaalee
Tekinoolojiin deggeramuudhaan
Koorniyaa Irratti Xiyyeeffatan Ilaalchisee
Qorannoo Geggeefame**

Senter for Infoormeeshin Reziili'eens

Bitootessa 2024

Seensa

Interneetiin, keessattuu marsariitiwwan hawaasaa dhimmoota dhuunfaatii fi kan hawaasummaa irratti wal-marii babal'aa fi ijaaroo ta'an taasisuuf akkuma carraa banan, dhimmoota yaaddoo ta'anis qabatanii as bahaa jiraachuun baramaera. Intarneetiin oddeeffannoo daddabarsuuf, walitti dhufeenya hawwaasummaa jabeessuuf, hojiilee dadammaqina hawaasaa fi hojii sosochii siyaasaa geggeessuuf karaa filatamaa ta'us; dirree miidhaaleen koorniyaa kan teekinooloojiin deggeramanii (Technology Facilitated Gender-based Violence (TFGBV) fi gochooti loogii irratti aggaamaman ta'aa dhufuun isaanis hubatamaa dhufeera. Nageenya oonlaayinii dubartootaa fi shamarran saafela ta'anii sirnaan tiksuu fi jireenya hawaasummaa keessatti hirmaannaa ga'aa ta'e qabaachuudhaan ga'ee ofii akka bahataniif jajjabeessuudhaaf miidhaalee teekinooloojiin deggeramanii koorniyaa irratti xiyyeeffatan qolachuu feesisa.

Kanarraa ka'uudhaan kaayyoleen pirojektii kanaa kanneen armaan gadiiti;

- Itoophiyaa keessatti dhimmoota miidhaalee teekinooloojiidhaan deggeremuun koorniyaa irratti xiyyeeffatan ragaalee qorannootiin deggeranii dhiheessuu,
- Dhaabileen mootummaa, dhaabileen hawaasa siivilii, kaampaanonni miidiyaalee hawwaasaa garaa garaa hoggananiif fi walii galatti hawaasni bal'aan miidhaalee kanneen irratti hubannoo fooyya'aa ta'e akka qabaatan gochuuf,
- Dhaabbileen sivilii fi dhaabbileen mootummaa Itoophiyaa keessa jiran rakkinicha furuudhaaf yaada furmaataa qoranichi akeeku akka galteetti fayyadamuudhaan hojiirra akka oolchaniif.

Qorannoo Senter foor Infoormeeshin Resiili'eens dhimma miidhaalee teekinooloojiin deggeramanii koorniyaa irratti xiyyeeffatan irratti geggeesse, kan marii qaamolee hawaasaa gara garaa fi waltajjiilee workshooppii walitti-fuufinsaan magaalaa Finfinee keessatti adeemsifaman gara garaa of keessatti hammateen taasiseen, Itoophiyaa keessatti miidhaan teekinooloojiin deggerame kan koorniyaa irratti xiyyeeffate dubartootaa fi shamarran saafela ta'an irratti akka aggaamamu mirkaneeffatee jira. Wayita waltajjiilee marii kana qindeessettis, hirmaattota waliin marii taasiseen Itoophiyaa keessatti aggaammiiwwan saala bu'ureeffatan gama marsarii hawaasaatiin dubartootaa fi shamarran saafela ta'an irratti sadarkaa olaanaa jedhamuun dandaa'amuun raawwatamaa jiraachuu hirmaattotni yaada dhiheessaniin irratti waliigaluu hubateera. Aggaammiiwwaan saala bu'ureeffatan kunneen keessaa kan akka haasaa jibbiinsaa, gochoota haaloo bahumsaa kan suur-sagalee wal-quunnamtii saalaa qooduun raawaatuu fi tuqaatiin saalaa biroon ni argamu. Akka hirmaattonni marii kanneenii kaasanitti yaadota furmaata rakkoo kanaa irra ga'uudhaaf miidhaalee kanneen ilaachisee hanqinni ragaalee akka jiru ni dubbatu. Kaayyoon qorannoo kanaas hanqina kana guutuudhaafi.

Teekinooloojiidhaan Deggeramee Miidhaa koorniyaa irratti Aggaamamu Qorachuun maaliif Barbaachise?

Haleellawwan gama intarneetiitiin saala irratti qiyyaafatan kunneen haala gocha miidhaa saalaa kan qabatamaan lafarratti mul'atuu yeroo hammeessan ni mul'atu. Dubartootni marsariitii hawaasaa irratti nageenyummaan yoo itti hin dhagaa'amu ta'e; lafarratti hirmaannaan isaan hawaasa keessatti qaban guutuu akka hin taaneef shora hiikkaa qabu akka isaan hawaasa isaanii keessatti hin taphanneef gufuu itti ta'uu mala. Gochi qoqqobbii akkasii kun dhiibbaalee hamoo ta'an kanneen biroo qaqqabsiisuu ni mala. Akka fakkeenyaatti, dubartoonni dhimmoota murteessoo ta'anii fi adeemsa ijaarsa diimookiraasii keessatti bakka-bu'umsa isaan qaban xiqqeessuu, akkasumas hirmaannaa isaanii daangessuu danda'a.

Miidhaaleen kunneen ilaalchota boodatti hafoo, seenessoota sobaa fi ilaalchota dhugeeffannaa (amantaa) dogongoraa ta'an fa'i. Qabiyyeewwan isaaniiis yaada qoqqobbii, loogii akkasumas gaalchaa fi jechoota ilaalcha tuffii mul'isan yeroo ta'an; ilaalchota micciiramoo kan akka seenaa, amantaa, siyaasaa fi aadaa irraa maddan bu'ureeffachuun ta'uu danda'a. Ilaalchonni fi yaadonni dhugeeffanna(amantaa) micciiramoo ta'an kunneen baay'inaan kan mul'atan karaa al-kallattii ta'een, bifa "maal nadhibdeetiin", utuu itti hin yaadinii akkasumas hanqina hubannaa irraan kan maddan; haleellaa fi aggaammiiwan saalaa raawwatamaniif daandii saagu. Haallonni qabatamoon kun ol guddachuudhaan gara reebichaatti hidhaatti, sirumayyuu gara sadarkaa miidhaa saala fi qaamatti guddachuu isaaniitiin dura jechoota kanneen akka arrabsoo fi tuttuqaa, akkasumas doorsisaatiif karaa banu. Aggaamiwwan kunneenis gara sadarkaa olaanaatti yeroo ol guddatan miidhaalee qaamaa fi qorqalbii hammaataa fi waaraa ta'e miidhamtoota irraan ga'anii darbu. Dabalataanis dubartoonni hirmaannaalee hawaasummaa irraa akka qoqqobaman taasisuudhaan qaamoleen murtii kennan murtiilee ragaa odeeffannoo bu'ureeffatan akka hin dabarsineef danqaraa uuma. Kenniinsa tajaajila hawaasaa keessattis ilaalchonni yaada daneessaa hammate jiraachuu dhiisuun qaamoleen bulchiinsaa akka hawaasa duratti amantaa dhaban taasisuu ni danda'a. Waan ta'eefis rakkoo kanaaf furmaatota imaammataa bocuudhaaf akaakuu haleellawan saalaa fi dirreewwan isaan fardeeffatan qorachuu fi qo'achuun barbaachisaadha.




Figure 1: Diagram to demonstrate the cycle of marginalisation within which TFGBV contributes. Diagram made by CIR.

Qorannoon kun Kutaalee Lama Qaba

1. **Qorannoon inni jalqabaa mata duree “Callisiisuu, Qaanessuu fi Sodaachisuu: Itoophiyaa keessatti hirmaannaa hawaasummaa gama marsariitiitiin godhamu keessatti miidhaalee dubartootaa fi shamarran saafellan irra ga’an”** (*Silenced, Shamed and Threatened: the online abuse of women and girls who participate in Ethiopian public life*)

Itoophiyaa keessatti dubartoonnis ta’e dhiironni aggaammii miidhaalee oonlaayiniitiif saaxilamoo ta’uun isaanii shakkii hin qabu. Kanarraa ka’uudhaan CIR dhibbaaleen sababa aggaammii gama oonlaayiniitiin qaqqaban maal akka fakkaatanii fi mudannoo namoota miidhaaleen kun irra ga’anii qorachuudhaaf qo’annoo kana taasiseera. Qo’annoo kanaafis dhimma kana irratti qorannoowwan kanaan dura hojjetamanii fi sandoota adda addaa qorateera. Dabalataanis, Sabaa-himaalee, dhaabbilee hawaasa siivilii fi dhaabbilee siiviil sarvisii garaa garaa keessatti qooda guddaa kan qabanii fi miidhaalee aggaammii oonlaayiniitiif saaxilamanii kan turan dubartoota 14 waliin af-gaaffii taasiseera.

Yaadota bu'uraa fi gaaffileen qorannichi deebisuuf abbalu;

- **Qabiyyee fi hamma:** Gosa qabiyyee miidhaalee oonlaayinii akkamiitu baay'inaan mul'ata?miidha-qaaqabsiistaota kunneeniin seenessonni adda ta'anii fi fardeeffataman ni jiruu?miidhaalee fi aggaammileen kunneen Itoophiyaa keessatti hagam babl'atnii jiru?marroon(irra deddeebiin) argama isaaniis maal fakkaata?
- **Bakka/Dirreewwan:** Dirreewwan marsariitii hawaasaa/fuul-barruulee kam fa'i irratti miidhaaleen/tuttuqaaleen kunneen aggaamamu? Miidhaaleen kunneen dirreewwan marsariitii hawaasaa hundaaf banaa ta'an(fuula twitarii, maxxansoota peejii Feesbuukii fi kkf) gubbatti moo kallattiidhaan gama daddabarsa ergaa gabaabaa(waatsaappii,meesenjerii, telegiraamii)tiin aggaamamu?
- **Kaayyoo/ galii:** qaamonni ykn namoonni miidhaa kana qaaqabsiisan kaayyoo maalii galmaan ga'uuf/maal yaada keessa galchuudhaan aggaammii kana raawwatu? Miidhaalee kana duuba qaamoleen miidhaa kana tumsan biroo ni jiruu?
- **Dhiibbaalee ykn gaaga'ama:** Haleellawwan kanaan kan xiyyeeffataman hojii ykn oogummaa namoota dhuunfaa, iccitii dhuunfaa jireenya namootaa fi kan maatii isaanii irratti gaaga'amni isaan geessisan maal fakkaatu? Sososochii guyya-guyyaan raawwatani fi jireenya dhuunfaa isaanii irratti dhiibbaan inni qaaqabsiise jiraa?

Akka yaada deebii hirmaattota af-gaaffii kana keessatti qooda fudhataniitti qabiyyeen, kaayyoonii fi dhiibbaan miidhaa kanaa koorniyaa aggaammiin kun irratti xiyyeeffatuun garaa gartummaa qaba deebii jedhu kennaniiru.caalmaatti dubartootaa fi shamarran saafellan irratti haleellaan aggaamaman koorniyaa irratti kan xiyyeeffatan ta'uudhaan gahee saala sanaa irratti qiyyaafachuu, eenyummaa isaanii xiqqeessuu irratti kan fuuleffatanii fi aggaammiwwan qabiyyee yaadaa safuu cabsan of keessaa qabaniin akka ta'e deebilee af-gaaffilee kanaaf kennaniin yaada isaanii qoodaniiru.

Fallaa kanaatiin aggaammiin dhiirota irra gahan bayyeen isaanii ibsa yaadota xiyyeeffannoon haleellaa Sanaa qaban, ilaachota yookanis ejjennoo siyaasaa irrattia akka xiyyeeffatan ibsanii jiru. Akka argannowwan kanaattis Itoophiyaatti addunyaa intarneetii keessatti hariiroon hawaasummaa qajeelaa hin taane kan mul'atu yeroo ta'u , qabiyyeen miidhaalee dubartoota irratti aggaamamanii kunneen dubartoonnii fi shamarran saafellan gahee isaan hawaasa keessatti qabaniin, sabummaa isaaniitiin, ilaalcha siyaasaa qabaniin, gocha haraamummaa (gocha quunnamtii saala wal fakkaataa) fi amantaa isaaniitiin kan wal qabate irratti kan xiyyeeffate ta'uu agarsisa.

Dubartoonni af-gaaffiin isaaniif godhame akka ibsanitti halleellaa/tuttuqaan intarneetii gubbaatti isaan irra gahu irraan kan ka'e marsariitii hawaasaa gubbaattis ta'e hirmaannaa jireenya hawaasummaa interneetiidhaan alatti geggeefamu keessatti hirmaannaa qaban akka dhaabanii fi callisuu akka filataniif dirqisiifamuu dubbatanii jiru. Hirmaannaa dubartootni oonlaayinii irratti qaban guddisuudhaaf dirree oonlaayinii nageenyi isaa eegame uumuun barbaachisaa akka ta'e qorannoon kun akeekke jira. Furmaata waraa fi bu'aa qabeessa ta'e fiduudhaaf akkasumas haleellawan oonlaayinii haala barbaachisuun qolachuudhaaf tarsiimoo guddaan hordofamuu qabu rakkinicha bu'urarraa gogsuudhaaf, fakkeenyaaf koorniyaa dhaan walqabatee ilaalchota micciiramoo ta'an qajeelchuudhaan loogii saala bu'ureeffate ittisuu fi hirmaannaan dubartootaa

dirrewwan hawaasummaa hundumaa gubbaatti akka dabaluu gochuu akka ta'e bu'aaa qorannoo kana ani mul'isa.

2. **Kutaa Lammaffaan Qorannoo kanaa mata duree “baratamaa fi dhokataa: Itoophiyaatti xiinxala haasaa jibbiinsaa saala xiyyeeffatee miidiyaa hawaasaa irratti geggeefamu”** (*“Normalized and Invisible”: An analysis of gendered hate speech on social media in Ethiopia*) jedhuun yeroo ta'u

Kutaan kun qorannoo isa marroo jalqabaa irratti kan hundaa'eefii bu'aa qorannoo marsaan duraa akeeku bifa tumsuun kan geggeefamedha. Kutaan kun gadi fageenyaan kan xiyyeeffatte Itoophiyaa keessatti teekinoolojiidhaan deggeramuudhaan haasaa jibbiinsaa saala bu'reeffatan irratti yoo ta'u direwwan marsariitii hawaasaa sadan(Feesbuukii, Teelegiraamii fi X) irratti qabiyyewan qoodaman qoratee jira. Qo'annoo isa duraatiin addatti kutaan kun saalaan alatti sababoota dachaa ta'an irratti hundaa'uudhaan haasaa jibbiinsaa namoota dhuunfaa irratti aggaamaman irratti xiyyeeffateera. (Kana jechuunis dubartin tokko sababa saala isheetiif qofa xiyyeeffannaa aggaamii taatee utuu jirtuu dabalataan eenyumaa seeraan tikfamoo ta'an jechuunis kan akka miidhama qaamaa, sabummaa fi amantii irratti hundaa'uu dhaan yeroo isheen haasaa jibbiinsaatiif saaxialmtu jechuudha).

Qo'annoo kanaaf akka ta'utti jechoonni haasaa jibbiinsaa ibsan 2058 ta'an afaanota afur(Afaan Amaaraa, Afaan Oromoo, Afaan Tigiree fi Afaan Ingilizii) irraa *saampilii* dhaaf walitti qabamanii jiru. Jechoota kana adda baasuuf CIR waltajjillee marii walitti fufiinsaan Finfinnee keessatti adeemsisaa tureera. Jechoonni kunneenis akka raga odeeffannootti waraqaa qorannoo kana waliin dhiyaatanii jiru. Xiinxalli ragaa odeeffannoo saampiloota kanaa wayita hojjetamutti qabiyyeen miidiyaalee hawaasaa (maxxansoota fuul-barruu) kunneen ramaddii sadiitti jalatti qoodamuun adda baafamaniiru. Ramaddiiwwan kunneenis kaayyoo qabiyyee haasaa jibbiinsaa sanaa, akaakuu qabiyyee(arrabsoo, doorsisa, ibsa koorniyaa amaloota murtaa'oo waliin wal qabsiisuun ykn yaada walqixxummaa saalaa hin kabjaneen) fi haala argama qabiyyeelee sanaa(dheekkamsiisaa, bifa tuffii agarsiisuun ykn salphisaa, yookaan bifa itti qoosuutiin/itti munaaguutiin kan mul'atan ta'u.

Gaaffilee Qorannichi Deebisuuf Abbalu

- **Bifa qabiyyee** (akaakuu fi miira isaa): Haasaa jibbiinsaa koorniyaa irratti xiyyeeffatan kanneen akkamiitu baay'inaan argama? Haasaa jibbiinsaa kunneen hiika akkamiitu of duubaa qabu? Saala tokko irraa gara birootti garaa garummaa qabuu?
- **Walitti dhufeennya**: haasaan jibbiinsaa saalaa irratti xiyyeeffate haasaa jibbiinsaa eenyumoota tikfamoo kan akka sabummaa fi amantii irratti xiyyeeffatan waliin yeroo taasifamu garaa garummaa akkamii qabaata?
- **Bakka/Argama**: haasaan jibbiinsaa saala irratti xiyyeeffate kun dirrewwan(fuula) miidiyaalee hawaasaa garaa garaa gidduutti addaa addummaa qabaa?

Qorannowwan lameen kunneen dubartootaa fi shamarran saafellan ga'eessota dhiira ta'anii fi saafellan dhiiraa caalaa haleellaan gama oonlaayiniitii fi haasaan jibbiinsaa akka isaan irra gahu adda baasanii jiru. Akka xiinxalli qabiyyee midiyaalee hawaasaa qorannoo kana mul'isutti dubartoonnii fi shamrran saafellan, dhiirota ga'eessa ta'anii fi saafellan dhiira ta'an, caalaa haasaa jibbiinsaa guddaa ta'e, kan akka ilaalchota tuffii saalaa mul'isanii fi dubbii kachachalaa ykn agiboo akkasumas haasaa jibbiinsaa miira balaafamaa of keessaa qabu xiqqaa ta'e ni keessumsiiisu. Dabalataanis, wayita eenyummaan tikfamoo ta'an biroon aggaamamanitti saalaan dhalaa ta'uun immoo toora interneetii gubbaatti miidhaalee dachaa ta'an kan biroof saaxilamaadha. Fakkeenyaaf dubartoonnii fi shamarran saafela ta'an akkasumas kanneen haraamuu(homosexual) ta'an(arrabsoo keessumsiiisuun), dubartootaa fi shamarran kanneen sababii sababa saala isaanitiif qofa aggaamiin isaanirratti raawwatu caalaaa doorsisaa fi aggaammiiwwan sadarkaa rifaasisoo ta'an isaan mudata.

Qorannoo kun dubartoonnii fi shamarran saafela ta'an eenyummoota tikfamoo ta'an kan biro caalaa haasaa jibbiinsaa keessumsiiisuu isaanii adda baafatee jira. Dubartoonnii fi shamarran carraan miidhaan gadaantummaa saalaa agarsiisu, kan loogii yookaan qooddaa koorniyaa akeeku ykn haasaan jibbiinsaa bifa itti qoosuutiin/agiboon raawwatu haasaa jibbiinsaa kan sabummaa fi amantaa irratti fuuleffate caalaa akka isaan mudatu ta'ee bifa/miira isaatiin yoo ilaalamu sadarkaan rifaasisummaa isaa kan warra dhiiraarra ga'uun gadi. Itti dabalees, haalli qabatamaan taatee lafarra jiruu waliin dubbii fi haasaa jibbiinsaa toora oonlaayinii gubbaa jiru akka fanfansu hubatamee jira. Kunis wayita ragaan odeeffannoo kqorannichaa walitti qabamutti, naannolee Itoophiyaa keessatti, haala wal dhabdee siyaasaa qabatamaa lafarra jiru yaada keessa galchuudhaan miidhaaleen dubartoota fi shamarran saafela ta'an kan saba Amaara fi Saba Oromoo ta'an irratti aggaamamu kanneen saba biro ta'an caalaa miidhaaleen haasaa jibbiinsaa dachaa (kan saala irratti xiyyeeffatanitti dabalee) ta'an akka isaan quunnamu hubatamee jira. Haasaan jibbiinsaa sababa taatee siyaasaa lafa jiruun sanaaf deebii kennuuf uumamuu fi qabiyyee isaani dubbii laallessaa ta'e of keessaa qaban kanneen haasaa jibbiinsaa koorniyaa irratti xiyyeeffatan caalaa ni mul'atu.

Mariileen marsaa minjaalaa fi waltajjiilee woorkishooppii akka mul'sanitti bifoorni haasaa jibbiinsaa teekinoolojiidhaan deggeramuun miidhaan koorniyaa irratti aggaaman yeroo baayyee garmalee hubatamuudhaan akka inni xiyyeeffannoo hin arganne taasisee jira. Itti dabalees haasaan jibbiinsa bifoora kan akka loogii saalaa, arrabsoo, jechoota tuffiii, yookaan haasaan jibbiinsaa gandaantummaa saala dubartootaa fi shamarran saafela ta'anii mul'isanii kanneen haasaa jibbiinsaa miira rifaasisoo qaban ykn yaadessoo ta'anii gaditti ilaalamu. Kanaafuu Itoophiyaa keessatti qabiyyee haasaa jibbiinsaa fi gaaga'ama inni qaburratti barnoonni fooyya'aa ta'e kennamuu feesisa. Miidhaan saala irratti xiyyeeffate, bifa saala qoqqobuun ykn ilaalcha saala addaan fo'een gadaantummaa saalaa haala akeekuun txiyyeeffannoo akka dhabetti itti fufee jira. Hirmaattonni waltajjii marii akka jedhanitti miidhaan koorniyaa bu'ureeffate hawaasicha keessatti baratamuu irra darbee sadarkaa akka waan hin jirreetti ilaalamuurra gahee jira.

Yaada Furmaataa

Tumsa qorannoo kanaatiifis, CIR Itoophiyaa keessaa qaamolee dhimmi ilaalu waliin hojjechuudhaan barruu yaadolee furmaataa hawaasa hirmaachisan imaammataaf galtee akka ta'utti qopheesseera. Haasaan jibbiinsaa qaama yookaan kaayyoo irratti xiyyeeffate irratti hundaa'uudhaan garaa garummaa akka qabu qorannoon kun ni ibsa. Garaa garummaa kanneen hubachuun nageenya dubartootaa fi shamarran saafela ta'anii oonlaayinii irratti tiksuum furmaata ka'umsa yaada imaammataa kennuuf ni fayyada. Bu'aaleen qorannoo kanaa dhaabbileen mootummaa murtoo imaammataa keessatti akka yaada galteetti akka fayyadaman hubachiisuu, kaampaaniwwan miidiyaalee hawaasaa garaa garaas qaamoleen hojii to'annoo qabiyyee miidiyaalee hawaasaatiif yaalii godhan keessatti akka itti fayyadaman akeekaa, dhaabbileen hawaasa siivilii garaa garaas hojiiwwan hawaasa dammaqsuu(Advocacy) hojjetan keessatti dhimma itti ba'uu fi hawaasni ballaanis furmaata rakkoo kanaatiif dhiibba akka godhan CIR abdi qaba.

Koonfiraansii Teekinoolojiin Deggeramuudhaan Miidhaalee Koorniyaa Aggaaman (TFGBV), Mata Duree TBC.

9 Caamsaa 2024 – Finfinnee

Koonfiraansii namoota dhuunfaa fi dhaabbilee dhimma mirga dubartootaa tiksuu irratti gama oonlaayiniis ta'e lafarratti hojjetan walitti fiduuf qophaa'e. Kunis kanneen nageenya oonlaayinii irratti hojjetan, kanneen dhimma miidhaa haleellaa koorniyaa teekinoolojiidhaan deggaamee aggaamamu fi haasaa jibbiinsaa qolachuu irratti hojjetan, yookaan kanneen imaammata bocuuf abbalan kan hammatuudha. koonfiraansichi waltajjii bu'aan qorannoo CIR dhimma TFGBV irratti geggeessaa ture kan ittiin ifatti ibsamu ta'ee, mariin haayyota dhimma kana iraatti ga'ee qaban waliin ni geggeefama, hojiin duula hawaasa dammaqsuu kan dhaabbata "Itoophiyaan Hiyyuman Raayits Diffeender Senter" jedhamuun durfamuu fi sagantaan eegzibiishiniin ni geggeefama. Kaayyoon sagantaa eegzibiishinii kanaas dhimmoota akka mirga dubartootaa, miidhaalee saala xiyyeeffachuun teekinoolojiin deggeramanii dubartoota fi shamarran irratti aggaamaman fi haasaa jibbiinsaa gama miidiyaalee hawaasaatiin facaa'an irratti hubannoo hawaasaa gabbisuuf, akkasumas agarsiisni muuxannoo hojii dhaabbilee Itoophiyaa keessa jiraniin haga yoonatti hojjetamanii ni dhiyaatu.

Sagantaa kanaanis, CIR fi michoonni isaa abdi jijjiirama fiduu akka biqilchan, harka walqabachuudhaan dhimmi TFGBV xiyyeeffannoo akka argatu gochuudhaaf abdi guutuu qabu.



**Centre for
Information
Resilience**